

**CONVENIO DE COLABORACIÓN ENTRE A VICEPRESIDENCIA SEGUNDA E CONSELLERÍA DE PRESIDENCIA, XUSTIZA E DEPORTES E A FUNDACIÓN CENTRO TECNOLÓXICO DO MAR (FUNDACIÓN CETMAR) PARA A EXECUCIÓN DO PROXECTO "MELLORA DAS CONDICIÓNNS DE SEGURIDADE ALIMENTARIA E NUTRICIONAL DA POBOACIÓN DE SECHURA A TRAVÉS DUN CONSUMO APROPIADO DOS PRODUTOS HIDROBIOLÓXICOS"**

**REUNIDOS**

Dunha parte, Diego Calvo Pouso, vicepresidente segundo e conselleiro de Presidencia, Xustiza e Deportes, actuando en nome e representación da Xunta de Galicia, en virtude do Decreto 60/2022, de 15 de maio, polo que se nomean os titulares das vicepresidencias e consellerías da Xunta de Galicia, no exercicio das facultades que lle confire o artigo 34 da Lei 1/1983, de 22 de febreiro, reguladora da Xunta e da súa presidencia.

E doutra parte, Paloma Dolores Rueda Crespo, na súa calidade de directora xerente da Fundación Centro Tecnolóxico do Mar (en diante Fundación CETMAR), clasificada como de interese benéfico-social por Orde da Consellería da Presidencia e Administracións Públicas do 2 de xullo de 2001 (DOG do día 13 do mesmo mes e ano), e declarada de interese galego por Orde da Consellería de Pesca, Marisqueo e Acuicultura do 20 de xullo de 2001 (DOG do día 27 do mesmo mes e ano), figurando inscrita co número 2001/15, e que intervén por conta e en representación da devandita Fundación, con capacidade para vinculala neste acto e en exercicio das facultades delegadas por acordo adoptado polo seu Padroado na súa sesión ordinaria celebrada o día 26 de xuño de 2009.

As partes comparecentes recoñécense mutuamente plena lexitimación, capacidade e representación para a sinatura do presente convenio e, a estes efectos

**EXPOÑEN**

**Primeiro.-** A Lei 10/2021, de 9 de marzo, reguladora da acción exterior e da cooperación para o desenvolvemento de Galicia establece, no seu artigo 81, como obxectivos da política pública de cooperación para o desenvolvemento, fomentar que todos os seres humanos poidan ampliar as súas opcións e capacidades para gozar dunha vida digna, próspera e plena e que o desenvolvemento económico, social e tecnolóxico se produza con criterios de xustiza social.

Así mesmo, no seu artigo 84.2 establece as modalidades da Cooperación Galega, sinalando no ámbito da cooperación exterior o investimento para o aumento do capital físico,

humano, social e tecnolóxico, e o desenvolvemento sustentable e inclusivo dos sectores produtivos.

Que a Xunta de Galicia, de acordo co exercicio das súas competencias e funcións en materia de cooperación para o desenvolvemento e co establecido no seu V Plan director da Cooperación Galega (2023-2026) establece entre os seus países prioritarios a Perú e incorpora como ámbitos estratéxicos a promoción dos dereitos sociais básicos, entre os que se atopa o dereito a unha alimentación nutritiva. Ademais recoñece coma un dos sectores de especialización a pesca e acuicultura sustentables.

En consonancia co anterior, o Plan anual 2023 da Cooperación Galega establece que se dea continuidade á cooperación con entidades para actuacións de cooperación no exterior en materia de pesca e acuicultura e propón que se continúe coa colaboración coa Fundación CETMAR no financiamento de proxectos de asistencia técnica, no ámbito pesqueiro e acuícola, que faciliten a transmisión de coñecementos e tecnoloxía aos países do Sur.

**Segundo.-** Que a Fundación CETMAR é unha fundación pública de interese galego con máis de 20 anos de experiencia e que ten entre os seus obxectivos colaborar no desenvolvemento do sector da pesca e acuicultura, executando proxectos pesqueiros e acuícolas cun enfoque de cooperación para o desenvolvemento e soberanía alimentaria.

**Terceiro.-** Que ambas partes comparten a conciencia da importancia de apoiar intervencións de cooperación para o desenvolvemento que favorezan o progreso dos pobos máis necesitados.

**Cuarto.-** Que a Dirección Xeral de Relacións Exteriores e coa Unión Europea, órgano superior da Administración autonómica da cooperación para o desenvolvemento consonte o establecido no Decreto 117/2022, do 23 de xuño, polo que se establece a estrutura orgánica da Vicepresidencia Segunda e Consellería de Presidencia, Xustiza e Deportes, considera axeitado e conveniente contribuír á mellora das condicións de seguridade alimentaria entre a poboación de Sechura, Perú, a través da posta en marcha desta intervención.

A singularidade e especificidade das actividades obxecto do proxecto, que son de claro interese público e inciden directamente no ámbito da cidadanía en xeral, a natureza específica da entidade destinataria da subvención, así como a súa necesaria posta en marcha, xustifican que a axuda solicitada se tramite por medio dunha concesión directa a través da formalización dun convenio de colaboración.

**Quinto.-** Que por isto acordan asinar o presente documento que se desenvolverá de acordo coas seguintes

## CLÁUSULAS

### **PRIMEIRA.- Obxecto**

O presente convenio ten por obxecto establecer as condicións polas que se rexerá a colaboración entre a Vicepresidencia Segunda e Consellería de Presidencia, Xustiza e Deportes e a Fundación CETMAR no proxecto denominado "Mellora das condicións de Seguridade Alimentaria e Nutricional da poboación de Sechura a través dun consumo apropiado dos produtos hidrobiolóxicos".

O proxecto ten como obxectivo contribuír á mellora das condicións de Seguridade Alimentaria e Nutricional da poboación sechurana a través da incorporación dos produtos hidrobiolóxicos na dieta da poboación do distrito de Sechura, mediante a realización das actuacións que se describen no anexo que se achega como parte integrante do presente convenio.

### **SEGUNDA.- Obrigas da Fundación CETMAR**

A Fundación CETMAR deberá:

1. Executar o proxecto referido na cláusula primeira.
2. Aportar 5.900,00 € para a execución do proxecto, que poderá ser financeiro ou valorizado en especie.
3. Destinar os fondos percibidos para financiar esa actuación.
4. Consentir expresamente a publicación da axuda concedida no Diario Oficial de Galicia, nas páxinas web oficiais da Xunta de Galicia e nos seus rexistros públicos, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia, no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006 e no artigo 16 da Lei 9/2007, do 13 de xuño, de subvencións de Galicia.
5. De acordo co disposto na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o Regulamento da Lei de subvencións de Galicia, a Fundación CETMAR comprométese a dar axeitada publicidade do carácter público do financiamento das actuacións obxecto do convenio, o cumprimento de tódalas condicións e obrigas recollidas neste convenio e o sometemento ás actuacións de supervisión e control previstas no mesmo, así como as xerais derivadas da aplicación da normativa de axudas e subvencións.

6. Prestar a colaboración e facilitar tanta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma, ao Consello de Contas de Galicia e ao Tribunal de Contas.
7. Conservar todos os comprobantes de gasto durante un período de 4 anos, coa excepción dos casos suficientemente xustificadas e autorizados pola Dirección Xeral de Relacións Exteriores e coa UE.
8. Xustificar, mediante declaración asinada, previamente ao cobro de calquera dos pagamentos da subvención, estar ao corrente no cumprimento das obrigas tributarias e fronte á Seguridade Social española e non ter pendente de pagamento ningunha outra débeda coa Administración pública da Comunidade Autónoma de Galicia, nin ser debedora por resolución de procedencia de reintegro. A entidade, conforme co establecido no artigo 20.3 da Lei 9/2007, do 13 de xuño, de subvencións de Galicia, autoriza ao órgano xestor para solicitar as certificacións que deban remitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia.
9. Velar porque tanto os restantes partícipes como a cidadanía con ela relacionada teñan coñecemento do financiamento desembolsado pola Xunta de Galicia e do apoio desta acción.
10. Solicitar autorización previa e expresa para calquera modificación substancial do proxecto, entendendo por tal aquela que afecte aos seus obxectivos, resultados, prazo de execución ou xustificación. As solicitudes de modificacións substanciais do convenio deberán estar suficientemente motivadas e ser formuladas por escrito dirixido ao director xeral de Relacións Exteriores e coa UE, que resolverá e notificará no prazo dun mes sobre a súa autorización ou denegación.

### **TERCEIRA.- Obrigas da Vicepresidencia Segunda e Consellería de Presidencia, Xustiza e Deportes**

A Vicepresidencia Segunda e Consellería de Presidencia, Xustiza e Deportes, do custo total do proxecto, que ascende a cento dezasete mil corenta e sete euros con oitenta e cinco céntimos (117.047,85€), aboará á Fundación CETMAR a contía máxima de cento once mil cento corenta e sete euros con oitenta e cinco céntimos (111.147,85€) con cargo á aplicación orzamentaria 06.07.331A.490.0 do orzamento vixente para o ano 2023.

A Fundación CETMAR poderá recorrer a terceiras fontes ou a diversos patrocinadores externos, previa consulta á Dirección Xeral de Relacións Exteriores e coa UE, pero en calquera caso todo incremento nos custos de execución será a risco e ventura da entidade, quen asumirá os custos asociados aos proxectos derivados da supervisión técnica, para dar fiel cumprimento aos obxectivos do proxecto.

A subscripción do presente convenio non implicará relación laboral, ou de calquera outra natureza, entre as persoas ou profesionais que desenvolvan as accións que constitúen o obxecto deste convenio coa Xunta de Galicia, de tal maneira que por este concepto non se poderá esixir responsabilidade algunha, nin directa nin subsidiaria.

#### **CUARTA.- Pagamentos anticipados**

Trala sinatura do presente convenio e previa petición da Fundación CETMAR, a Dirección Xeral de Relacións Exteriores e coa UE concederá un anticipo pola contía máxima do importe da subvención concedida, de acordo co previsto no artigo 94.3 a) da Lei 10/2021, do 9 de marzo, reguladora da acción exterior e da cooperación para o desenvolvemento de Galicia e na disposición adicional segunda da Lei 9/2007, do 13 de xuño, de subvencións de Galicia, para afrontar os pagamentos inmediatos que leva a execución deste proxecto.

Coa solicitude do anticipo deberá presentar:

- Declaración do conxunto das axudas recibidas doutras entidades públicas ou privadas para o mesmo fin, de acordo co establecido nos artigos 11, letra d), da citada Lei 9/2007, do 13 de xuño e 22 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.
- Declaración de estar ao corrente no cumprimento das obrigas tributarias e fronte á Seguridade Social española e non ter pendente de pago ningunha outra débeda coa Administración pública da Comunidade Autónoma de Galicia, nin ser debedora por resolución de procedencia de reintegro de acordo co establecido no artigo 10.3 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

#### **QUINTA.- Xustificación do proxecto**

A xustificación da execución do proxecto efectuarase por parte da Fundación CETMAR nun prazo máximo de tres meses, a contar dende a finalización das actividades programadas, de conformidade co establecido no artigo 94.3 d) de la Lei 10/2021, do 9 de marzo, reguladora da acción exterior e da cooperación para o desenvolvemento de Galicia.

Para a xustificación final da realización das actividades subvencionadas e da consecución dos obxectivos previstos, a Fundación CETMAR deberá presentar:

- Un informe final sobre os obxectivos, as actividades realizadas e os resultados obtidos.

- Unha certificación acreditativa do cumprimento da finalidade para a que foi concedida a subvención e da aplicación dos fondos á finalidade destinada, expedida polo secretario da Fundación.
- Unha certificación da totalidade dos gastos realizados e pagados na execución deste convenio, expedida polo secretario da Fundación.
- Unha declaración do conxunto das axudas recibidas doutras entidades públicas ou privadas para o mesmo fin, de acordo co establecido nos artigos 11 letra d) da citada Lei 9/2007 e 22 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

Os fondos faranse chegar por transferencia bancaria á conta corrente que a Fundación CETMAR indique, mediante a presentación da certificación na que conste a súa titularidade, non asumindo a Xunta de Galicia os gastos bancarios que se derivasen desta actuación.

A alteración das condicións tidas en conta para a concesión das subvencións e, en todo caso, a obtención concorrente de axudas outorgadas por outras administracións, entes públicos ou privados, poderá dar lugar á modificación da resolución de concesión.

Esta subvención será compatible con calquera outra procedente doutras administracións públicas ou entes públicos ou privados para a mesma finalidade, sempre que o importe total delas non supere o custo total do proxecto subvencionado.

Os rendementos financeiros que fosen xerados polos fondos librados aos beneficiarios incrementarán o importe da subvención concedida e aplicaranse igualmente ás actividades subvencionadas.

#### **SEXTA.- Facultades de inspección**

A Vicepresidencia Segunda e Consellería de Presidencia, Xustiza e Deportes, a través dos seus servizos técnicos, resérvase a facultade de realizar as inspeccións e comprobacións que considere necesarias co fin de asegurar o cumprimento das normas e requisitos cos que se concede esta axuda.

#### **SÉTIMA.- Publicidade**

A Fundación CETMAR obrígase a incorporar de forma visible en todas as accións derivadas das actividades subvencionadas (placas, letreiros, carteis, publicacións, material de difusión, publicidade e outros medios análogos) os logotipos oficiais da Xunta de Galicia e da Cooperación Galega, todo iso en formato duradeiro e material resistente para a debida difusión da orixe da subvención. Cando a organización financiada exhiba o seu propio logotipo, o da Xunta de Galicia e o da Cooperación Galega deberán figurar co mesmo

tamaño e con iguais condicións de seguridade. Os logotipos serán facilitados pola Dirección Xeral de Relacións Exteriores e coa UE.

#### **OITAVA.- Seguimento do convenio**

Para facilitar o seguimento e cumprimento do convenio constituirase unha Comisión Mixta, integrada por un representante da Vicepresidencia Segunda e Consellería de Presidencia, Xustiza e Deportes, designado pola Dirección Xeral de Relacións Exteriores e coa UE, e un representante da Fundación CETMAR.

A Comisión Mixta ditará as súas propias normas de funcionamento, debéndose reunir cando o solicite algunha das partes.

As súas funcións serán:

- Interpretación do convenio.
- Intervención previa á resolución por incumprimento.
- Calquera outra relacionada co desenvolvemento do presente convenio.

#### **NOVENA.- Causas de resolución**

O presente convenio resolverase:

- a) Por incumprimento total ou parcial dalgunha das estipulacións que o regulan.
- b) Pola aplicación dos fondos para fins distintos dos que motivaron a súa concesión.
- c) Polo transcurso do tempo fixado sen que se execute o investimento obxecto da subvención.
- d) Polo desistimento das partes.

De resolverse o convenio, a Vicepresidencia Segunda e Consellería de Presidencia, Xustiza e Deportes poderá, no seu caso, esixir o reintegro total ou parcial das cantidades achegadas. Igualmente, de conformidade co disposto no artigo 17.3 da Lei 9/2007, do 13 de xuño, procederá o reintegro do exceso percibido no suposto de que o importe da axuda, illada ou en concorrencia con outras subvencións ou axudas, ingresos ou recursos, supere o custo da actividade subvencionada.

#### **DÉCIMA.- Vixencia do convenio**

O presente convenio entrará en vigor ao día seguinte da súa sinatura e manterá a súa vixencia ata o 31 de decembro de 2023. Sen prexuízo do anterior, poderanse incluír as actuacións iniciadas dende o mes de xaneiro de 2023, conforme ao establecido nos artigos

2, apartado 1.b), da Lei 9/2007, do 13 de xuño, de subvencións de Galicia e 2.2.b do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

#### **UNDÉCIMA.- Natureza do convenio**

O presente convenio ten natureza administrativa e as discrepancias que xurdan pola súa aplicación serán resoltas no prazo dun mes, previo informe ou proposta da Comisión Mixta, pola Vicepresidencia Segunda e Consellería de Presidencia, Xustiza e Deportes, quedando as partes suxeitas á xurisdición contencioso-administrativa, nos termos establecidos na Lei 29/1998, do 13 de xullo, reguladora da Xurisdición Contencioso-administrativa, para a resolución de calquera conflito que puidese xurdir na súa aplicación.

#### **DUODÉCIMA.- Portal da Transparencia**

As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas nel, poidan ser publicados no Portal da Transparencia e Goberno Aberto.

En cumprimento do disposto nos artigos 18 e 20.8 da Lei 38/2003, do 17 de novembro, xeral de subvencións, comunicárase a subscrición deste convenio á Base de Datos Nacional de Subvencións, que opera como sistema nacional de publicidade de subvencións.

#### **DECIMOTERCEIRA.- Reintegro por incumprimento**

Se a entidade beneficiaria incorrese en falsidade ou ocultación de datos ou non acredítase, total ou parcialmente, o bo fin das cantidades percibidas, deberá proceder ao reintegro da totalidade delas en caso de incumprimento pleno, ou da parte proporcional en caso dunha falta parcial de xustificación, sen prexuízo da esixencia das responsabilidades administrativas e penais que procedan.

Así mesmo, a entidade beneficiaria deberá reintegrar a subvención nos demais supostos previstos na normativa de aplicación.

#### **DECIMOCUARTA. - Modificación do convenio**

O presente convenio poderá ser modificado por mutuo acordo das partes a través da subscrición da correspondente addenda modificativa, que deberá ser subscrita polas mesmas autoridades que asinan este convenio.

### **DECIMOQUINTA.- Normativa aplicable**

O presente convenio rexerese polo disposto na Lei 10/2021, do 9 de marzo, reguladora da acción exterior e da cooperación para o desenvolvemento de Galicia, na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, na Lei 1/2016, do 18 de xaneiro, de transparencia e bo goberno, na Lei de orzamentos xerais da Comunidade Autónoma de Galicia para o ano 2023 e demais normativa que sexa de aplicación.

E, en proba de conformidade co expresado neste convenio, asínase electronicamente polas partes na data indicada.

POLA XUNTA DE GALICIA  
O VICEPRESIDENTE SEGUNDO E  
CONSELLEIRO DE PRESIDENCIA, XUSTIZA  
E DEPORTES

POLA FUNDACIÓN CENTRO  
TECNOLÓXICO DO MAR A DIRECTORA  
XERENTE

Diego Calvo Pouso

Paloma Rueda Crespo

## ANEXO

### 1.- OBXECTIVOS

**Obxectivo xeral:** Contribuír á mellora das condicións de Seguridade Alimentaria e Nutricional da poboación sechurana a través da incorporación dos produtos hidrobiolóxicos na dieta da poboación do distrito de Sechura.

**Obxectivo específico:** Mellorar o aproveitamento de produtos hidrobiolóxicos na poboación sechurana a través do fortalecemento de capacidades e sensibilización da poboación nos beneficios e contribución dos mesmos a unha nutrición saudable e rica en nutrientes e proteínas

### 2.- RESULTADOS

**Resultado 1.** Fortalecidas as capacidades técnicas no Distrito de Sechura sobre formación, sensibilización e mellor aproveitamento dos produtos hidrobiolóxicos.

- Actividade 1.1: Desenvolvemento e implementación dun programa de formación, sensibilización e mellor aproveitamento dos produtos hidrobiolóxicos para técnicos da baía de Sechura.
- Actividade 1.2: Desenvolvemento e implementación dun programa de formación, sensibilización e mellor aproveitamento dos produtos hidrobiolóxicos para docentes da Baía de Sechura
- Actividade 1.3: Intercambio de experiencias entre a Consellería do Mar da Xunta de Galicia e o Programa Nacional A Comer Peixe (PRODUCE).

**Resultado 2.** Mellorado o aproveitamento e consumo de produtos hidrobiolóxicos nas unidades familiares e os centros escolares do distrito de Sechura.

- Actividade 2.1: Deseño, elaboración e implementación dun programa formativo orientado ás unidades familiares sobre alimentación saudable a través do aproveitamento dos recursos hidrobiolóxicos.
- Actividade 2.2: Diversificación das dietas das unidades familiares a través do aproveitamento de produtos hidrobiolóxicos de baixo custo.
- Actividade 2.3: Mellora da percepción da actividade pesqueira e acuícola entre a poboación sechurana.
- Actividade 2.4: Reforzar a inclusión dos produtos hidrobiolóxicos nos centros escolares

## 2.- FINANCIAMENTO

Partidas orzamentarias	Xunta de Galicia	Fundación CETMAR
Aluguer Terreos e inmobles	200,00	
Equipos e materiais	10.340,00	
Inventariables	3.500,00	
Consumibles	6.840,00	
Persoal	53.000,00	5.900,00
Servizos técnicos	18.800,00	
Funcionamento en terreo	150,00	
Viaxes, aloxamentos, axudas de custo	18.493,35	
Gastos financeiros	500,00	
Custes administrativos e de xestión	9.664,50	
<b>Total financiamento por entidade</b>	<b>111.147,85 €</b>	<b>5.900,00 €</b>
<b>ORZAMENTO TOTAL PROXECTO</b>	<b>117.047,85 €</b>	